


教
家
編

BJ
1558
C5453
V.2



教家編 下卷

古宜梁顯祖良夫氏纂定

積德行

積善之家。必有餘慶。積不善之家。必有餘殃。此孔子繫易之辭也。以必有斷之。言其效之必應也。蓋人有一二善。未必便有善報。人有一二惡。未必便有惡報。然今日作一善。明日作一善。積之不已。人欽神相。福慶必來。今日作一不善。明日作一不善。積之不已。人怨神怒。禍殃必至。故聖人又申之曰。

善不積。不足以成名。惡不積。不足以滅身。成名卽
慶也。滅身卽殃也。豈惟身名已哉。所謂餘者。言其
殃慶尚及於子孫也。昔有客與真西山論世間百
物皆有影。惟人心無影。西山曰。人之行事善惡。便
是心之影子。子孫賢不肖。便是心之影之驗。故聖人
論及人家子孫昌茂。皆其祖父積德所致。詎不信

夫。馬體衢
敎家箴

問積善曰。陰也。故於坤見之。積之如何。曰。積於小
也。小人以小善爲無益而弗爲。則所爲皆小惡矣。

古曰矜細行。曰勤小物。矜細勤小。積之謂也。俟大
而爲虛。日不旣多乎。惟小與細。日日有之。故可以
用積。泰山河海。積斯成矣。矜於細。勤於小。又安有
遇大而不爲者乎。陳幾亭學言

古人重厚樸直。乃能立功立事。享悠久之福。士人
所貴。節行爲大。軒冕失之。有時而復來。節行失之。
終身不可得矣。賈文元戒子孫文

凡門第高。可畏。不可恃也。立身有失。得罪重於他
人。死無以見先人地下。此所可畏也。門高易驕。族

盛招忌。懿行人未之信。少有疵隙。衆指乘焉。此所不可恃也。故膏梁子弟。學加勤。行加勵。僅得比他

人爾。

柳北戒子弟

士君子心存利濟。或力不從心。惟常存善念。廣行方便。遇人急難處。出一言解救之。遇人癡迷處。出一言開導之。遇可着力處。不惜挺身超救之。立心制行。無非陰陽爲念。是亦種德也。司馬溫公曰。積金以遺子孫。子孫未必能守。積書以遺子孫。子孫未必能讀。不如積陰德於冥冥之中。以爲子孫長

久之計。宋真宗曰。施恩布德。乃世代之榮昌。懷妒
報仇。爲子孫之禍患。宋神宗亦曰。苟貪妒損。終無
十載安康。積善成仁。必有榮華後裔。

鐸言

子弟何德何能。不過藉祖宗之力。掙得基業。居此
現成時勢。自反實屬可媿。若不倍加勉勵。積德累
行。而公然居之不疑。務求適已。不畏人言。妄自尊
大。侮慢寒微。勝已者忌之。不若已者笑之。見人有
善。則疑之。聞人不善。則揚之。或好游蕩。或縱酒色。
敗名喪檢。人於面前。不得以尊稱。稱之。背後卽

以奴隸目之。豈不可羞。

靳氏家訓

大凡善行。不待安排。一出於自然者。非上智不能。其次於日用事物之間。分別是非。見所當行。則奮發必爲。所不可爲。則堅忍不行。久之心與理契。動少過舉。自不失爲有德有行之士。至若二氏之教。以茹素爲修行。以布施爲積德。與我儒之所謂德行。判若星淵。而無知者。猶謂三教合一。謬甚。宜痛絕之。

人家門祚昌盛。皆由修德砥行。世代相承。故能久。

而勿替。若爲祖父者。不能積德行以貽其子孫。爲子孫者。復不能積德行以繼其祖父。未有不立見傾覆者矣。吾家高曾以來。代傳忠孝。吾父纘承基業。不懈於修。迄今瓜瓞綿綿。仕宦相繼。但恐後之子若孫。安享基業。罔念艱難。加以氣質之偏。習俗之染。耳目紛紜。則心志惑亂。心志惑亂。則事爲乖張。祖宗數十載之貽謀。保其不一旦墜耶。是故欲立。光前裕後之業務。爲積德累行之修。發一念行一事。必思天理上無一毫虧欠。稍雜私欲。急遏絕。

之。毋飾之昭昭。而墮之冥冥。從來聖賢工夫。只是
箇戒懼慎獨。而終身德行。卽樹立於此。若乃世間
敗德喪行。種種不一。而莫甚於貪財好色。少年子
弟。能從此處立得腳根。不爲所中。則其他無一足
爲我難。而德行日積矣。士君子爲善。盡其在我。豈
敢責報於天。然易曰。必有餘慶。書曰。降之百祥。則
昌大祖業。蔭庇後昆。又理之斷然不爽者也。吾子
孫其勗之。以上梁氏家訓

經食用

古之爲國者。豕宰制國用。在於歲之杪。五穀皆入。然後制國用。用地大小。視年之豐耗。三年耕。必有一年之食。九年耕。必有三年之食。以三十年之通制國用。雖有凶旱水溢。民無菜色。國旣若是。家亦宜然。故凡家之田疇。足以膳給者。亦當量入以爲出。然後用度有準。豐儉得中。怨讟不生。子孫可守。今以田疇所收。除租稅及種溉糞治之外。所有若干。以十分約之。畱三分爲水旱不測之備。專存米穀不可變易銀鈔輕費其七分作十二月之用。閏月則分作十三月之用取一

月合用之數。約爲三十分。日用其一。

茶飯魚肉賓客酒漿子孫

紙筆先生束修幹事奴僕等皆取諸其間

可餘而不可盡。用至七分爲

得中。不及五分爲太奢。其所餘者。別置簿收管。以

爲伏臘裘葛。修葺墻屋。醫藥賓客。吊喪問疾。時節

饋送。又有餘。則以周給鄰族之貧弱者。賢士之貧

困者。佃人之饑寒者。過往之無聊者。毋得妄施僧

道。蓋僧道本是蠹民。施之適足以濟其嗜欲。長其

過惡。而費農夫汗血勤勞所得之物。未必不增吾

罪。其何福之有。其田疇不多。日用不能有餘。則一

味節嗇。裘葛取諸蠶績。墻屋取諸畜養。雜種菜蔬。皆以助用。不可侵過。次日之物。若一日侵過。無時可補。則便有廢家之漸。當謹戒之。其有田少而用廣者。但當清心儉素。經營足食之路。於接待賓客。吊喪問疾。時節饋送。會合飲食之事。一切不講。免致干求親舊。以滋過失。責望故素。有所怨尤。負欠逋借。以招耻辱。家居如此。方爲稱宜。而遠客侈之咎。積是成俗。豈惟一家不憂水旱天災。雖一郡一縣。皆無憂矣。

居家之病有七。曰呼。曰遊。曰飲食。曰土木。曰爭訟。曰玩好。曰惰慢。有一於此。皆能被家。其次貧薄而務周旋。豐餘而尚鄙猥。事雖不同。其終之害。或無以異。但在遲速之間耳。夫豐餘而不用者。疑若無害也。然已既豐餘。則人望以周濟。今乃恣然。則失人之情。既失人之情。則人不佑之。惟恐無隙。苟有隙可乘。則爭媒蘖之。雖其子孫。亦懷不滿之意。一旦入手。若決隄破防矣。前所言存畱十之三者。爲豐餘之多者制也。苟所餘不能三分。則存二分亦

可。又不能存二分。則存一分亦可。又不能存一分。則宜節嗇用度。以存贏餘。然後家可長久。不然。一旦有意外之事。家必破矣。記曰。喪用三年之防。註謂防什一也。正今所存畱三分數。凡喪葬所費其豐儉之節。當以此為準。今謂人家婚禮當視喪禮所費。則豐儉亦似得中。其有貧者。豈可復立準。則所謂斂手足形還葬而無槨人。豈有非之者。則婚禮宜俱無所費。所謂追其謂之。前所言一切不講者。非謂絕其事也。謂不足矣。能以貨財爲禮耳。如吊喪。則以先往後罷爲助。賓客則樵蘇不爨。清談而已。至如奉親至急也。啜菽飲水盡其歡。祭祀宜嚴也。疏食菜羹致其敬。凡事

皆然。則人固不我責。而我亦何嫌哉。如此則禮可不廢。而財不匱矣。前所言七分爲十二月之用。以一月合用之數。約爲三十分者。非謂必於其日用盡。但約見每月每日之大概。其間用度自爲贏縮。惟是不可先次侵過。宜先餘而後用。世言皆謂用度有何窮盡。蓋是未嘗立法。所謂豐儉皆無準則。好豐者妄用以破家。好儉者多藏以斂怨。無法可依。必至於此。愚今考古經國之制。爲居家之法。隨貴產之多寡。制用度之豐儉。合用萬錢者。用萬錢。

不謂之侈。合用百錢者。用百錢。不謂之鄙。是取中

可久之計也。

以上陸梳山
居家備用

居家最要於勤。勤則一家之人。不至於惰廢。而無
遊手閒食。以相率爲不義之事。敬姜之教子曰。民
勞則思。思則善心生。逸則怠善。怠善則惡心生。此
之謂也。蓋自天子以至庶人。無一人無職事者。身
居四民之中。而一無所事。坐享衣食。是天地之耗
蠹。民生之蝨賊也。若主公主母。早起晚睡。先盡其
家長之職。以率其男女子弟。使各勉其卑幼之職。

又率其內外婢僕。使各供其力役之職。凡男子則耕讀工賈。婦人則紡織針指。無分貴賤。各竭其力。則既可以成人。亦可以成家。諺云。成人不自在。自在不成人。又云。合家一心。黃土變成金也。其次又莫要於儉。儉非鄙吝之謂也。先總計一家之中。人口若干。每歲衣食用度。必須若干。因而制財用之經。量入以爲出。一切吉凶之費。皆有限制。又須常畱贏餘。以備不時意外之需。至堂室舟車服飾器用。則概從儉樸。勿得矜勝而觀美。如此則

可勉窘乏難繼之患。而家風亦謹飭有餘矣。以上
靳氏

家訓

做家第一關鍵。必要除去債根。爲實地。我無所負。
欠於人。則錙銖積累。皆我所有。人不得而利之。不
然。則生之雖勤。而子母倍償。輾轉相尋。凡我所有。
勢必盡填無窮之壑。雖生何益。昔王十朋進理財
之策。有云。生財不如節財。省用方能足用。此萬世
足國之藥石也。亦我輩作家之藥石也。梁氏
家訓

重祭葬

冠昏喪祭。禮之大者。今人都不理會。豺獾皆知報本。今士大夫家多忽此。厚於奉養。而薄於先祖。甚不可也。某嘗修六禮大略。家必有廟。廟必有主。月朔必薦新。時祭用仲月。冬至祭始祖。立春祭先祖。季秋祭禰。忌日遷主祭於正寢。凡事死之禮。當厚於奉生者。人家能存得此等事數件。雖幼者可使

漸知禮義。

程伊川

葬者藏也。孝子不忍其親之暴露。故斂而藏之。齋送不必厚。厚者有損無益。古人論之詳矣。今人葬

不重於古。而拘於陰陽禁忌則甚焉。古者雖卜宅
卜吉。蓋先謀人事之變。然後質諸蓍龜。庶無後艱
耳。無常地與常日也。今之葬書。乃相山川岡畝之
形勢。考歲月日時之支干。以爲子孫貴賤貧富壽
夭賢愚皆繫焉。非此地。非此時。不可塋也。舉世惑
而信之。於是葬親者。往往久而不葬。問之曰。歲月
未利也。又曰。未有吉地也。又曰。宦遊遠方。未得歸
也。又曰。貧未能辦葬具也。至有終身累世而不葬。
遂失尸柩。不知其處者。嗚呼。可不令人深歎愍哉。

人所貴於身後有子孫者。爲能藏其形骸也。其所
爲乃如是。曷若無子孫。死於道路。猶有仁者見而
殮之耶。司馬溫公

古者庶人無廟而祭於寢。寢者前堂也。宋時庶人祭三

代而不及高祖。程子言高祖有服。不可不祭。朱子

謂程子此言。深得祭祀之本意。故其祠堂之議。亦

斷自高祖以下。今爲祠堂者。當如朱子之說。隔爲

四龕。高祖居左。曾祖居右。祖居次左。考居次右。位

皆南向。凡伯叔祖考妣當祭者。祔高祖龕側。伯叔

考妣當祭者。祔曾祖龕側。故兄弟姊妹當祭者。祔祖龕側。故子姪當祭者。祔考龕側。其後高祖既遷。則曾祖居高祖之位。祖居曾祖之位。考居祖之位。第五世新祔者。居考之位。所有祭品祭服。不許他用。古人謂祭繼養也。蓋祖父母已亾。而子孫之養不逮。故爲春秋忌祭以繼其養。然祖考之神不可褻。尤有甚於祖考之存時。而子孫哀祖考之不在。其恭敬之心。尤宜切於祖考之存時。故七日戒。三日齋。其所謂齋且戒者。在乎必誠必信。起敬起孝。

而巳。如此方望祖考之來格。不然。則雖豐牲之祭。神不享矣。此誠不可不慎。

葬者藏也。藏者完歸於土之義。人子於其親之完歸。乃假之爲身家謀。爲後嗣計。一求於風水。再求於日月。各執其房分。而阻於卦例。星辰之吉凶。各持其年分。而撓於支干。龜筮之生剋。遂至累數年而不克葬。豈思生者禍福之來。尚未可必。而死者暴露之久。實大可傷。又有溺信風水。至侵占他人山地。伐人塚。棄人祖父母骸骨。怨連訟結。抵死求

勝。至於傾家敗業。而地終不可得。親終不成葬。福
應尚遠。禍應至近。何其愚一至此。以上馬體
衢教家箴

祭者家之大事。且今五祀之禮缺如。惟有祭先一
舉。相率草草。安能以孝敬貽後。約之有三。宜專宜
豐。潔宜時。祭器以潔為主。特作一櫥置祠堂內。諸
凡攢盒甌筋。共合用若干。悉貯其中。臨祭取洒濯
之用。畢。仍濯而藏之。不得移借他用。祭品隨四時
應祭之期。各定額式。惟長至除夕用猪羊。每桌五
菓一盃。熟味十器。餘時或用三牲。或用熟味。各從

所宜。並應豐潔。與宴相似。不然。是敬先不及客也。
豈古人鷄供母。菜供客之義哉。所謂時者。如清明。
則加角黍之屬。端陽則菖蒲雄黃。又祭丁之日。邑。
大夫祭胙。宜以聖餽特饗祖先。惟以原胙而已。不。
添餘味。奠以清酒。用明特舉。讀聖賢書。世世爲士。
水源木本。使幽明共欣。稽古之榮。此古禮所未見。
以義起之。大抵與事生相似。卽於心獲安。且後世。
患疏不患數也。拜儀惟長至除夕。及冠婚大事。若。
遠遊經年初歸者。八拜。餘皆四拜。

陳幾亭
家矩

古禮之廢也久矣。葬之弊爲尤甚。古之葬者。萬民各以其族。區分而序列之。惟有罪者。則不入兆域。至周之季。雖稍變弛。然族葬之禮未變也。昔嘗觀乎洙泗之間。拜先聖人之墓。見伯魚子思之冢。昭穆序葬。而子孫咸祔其側。至今二千年而未已。猶有先王之遺意焉。今之人。儒衣冠而誦六藝者。皆以學孔子自名。至於葬其親。則往往信俗巫冢師之說。爲其身謀。或父子異處。或兄弟殊遷。使其魂魄不相接。形氣不相依。與黜罰其親。何異乎。而猶

以儒稱於人。不亦妄矣乎。

方正學孝友菴記

喪不延客。不作雜劇。不尚佛事。不張鼓吹。不煖喪。

不途陳玩器。排筵歌舞。及強孝子飲酒。

呂豫石

葬有五患。不得不謹。須使他日不爲道路。不爲城

郭。不爲溝池。不爲貴勢所奪。不爲耕犁所及。舍五

者之外。若斤斤然擇地之方位。決日之吉凶。以奉

親爲後圖。而以利後爲急着。豈孝子之用心。

古人所謂卜其宅兆者。乃孝子慈孫之心。重親遺

體。使他日不爲城邑道路溝渠耳。世人惑郭璞之

說有貪求吉地。至數年不葬親者。有既葬不吉。一掘未已。至三四次者。有因地至訟。未入土而家已蕭條者。有兄弟惑於各房風水之說。至骨肉化爲仇讐者。語不云乎。龍穴非遙。只在貯藏方寸地。牛眠在邇。空勞踏破隴頭雲。

以上昨非菴日纂

衣衾棺槨外。惟灰沙第一。切要實用。若孝帛旛幢。乃無益虛文。至鼓吹優伶。尤悖禮侈靡。移此備彼。不亦善乎。

喪禮須致哀中之敬。祭禮須致敬中之哀。

以上高六石

世之論者。謂子孫顯達。家業昌隆。全係於一抔之
土。由是溺信堪輿。搜尋風水。求以葬其親而益其
子孫。卒至歲月耽延。迄無定向。子孫之顯達。杳乎
莫必。而暴露其親之罪。已莫追焉。予以爲風水斷
不足恃。所恃者禮義而已耳。今夫禮義之在一家。
其道豈遠求哉。父子兄弟。夫婦長幼。尊卑上下。有
肅然不敢犯之分。與藹然不可解之情。是卽所爲
禮義也。有是禮義以治其一家。則型仁講讓。必不
萌乖戾之端。積德累行。必不召陵夷之禍。書曰作

善降之百祥。易曰積善之家必有餘慶。夫善孰善於禮義而曰降祥。曰有慶。則向所謂子孫顯達家業昌隆不已得諸此而斷然矣乎。乃今之人不務禮義而惟風水之是求。殊不知苟無禮義即使風水果佳。吾知其必替。若有禮義即使風水或惡。吾知其必興。且夫堪輿家各矜其術。各是其說。爲吉爲凶。彼此互執。向使風水果有應驗。而吉與凶已無確然一定之見。可以信從。而况應驗萬萬無之人。奈何舍我可必之禮義而勞勞焉謀不可必之。

風水也哉。如以予言爲非。是試觀宋明大儒其辨風水至詳。其闢風水至力。是豈無見而云然。至於義路禮門。聖賢之教人。又彰彰在耳目間矣。今讀聖賢書。不能遵聖賢之教。反被邪說誑誘。可乎。

人子事親。事無大於喪葬者。喪則俾子心之克盡。葬則俾親體之得安。哀敬畢達。而不違乎禮。如是焉已矣。今之喪葬者。不然。親歿之日。棺槨衣衾。往往簡略。而無益之儀文。則日費數十金。而不惜。緇衣黃冠。禮之賓朋之上。笙簫鼓樂。達於隣里之間。

金銀楮帛。照耀戶庭。而親屬之餽奠者。擊豕判羊。堆几盈案。甚且剪綵巧作諸般。製軸雜施五色。殊無哀痛其親之意。及其發引舉殯。則騶從爛若雲霞。財樓高如山阜。而又走馬跳竿。弄丸打鼓。僧道張繡蓋。優伶着舞衣。作種種戲玩。以悅人耳目。尤屬背理。至於三年除服。則又簪花披紅。親友稱賀。皆爲傷風敗俗之事。吾家禮法相傳。喪葬當悉依文公家禮。而無用之繁文。非禮之浮費。在所必禁。非吝也。先王之禮爲子之道。固當然也。

家中設立家廟。四時之祭。皆宜在廟中行禮。墓祭
非古也。特始於東漢耳。但世俗相沿已久。故程朱
大儒亦從之。我家除清明七月十五十月初一日。
從俗往墳園致祭。其餘諱日及薦新等禮。俱於廟
中行之。吾子孫各宜清念慮。正衣冠。卽如祖考之
在上。不得在旁嬉笑放肆。

一切時食。先薦祖宗。冠婚生子嫁女之事。必告祖
宗。遠行及歸家之日。亦必在祖宗前致誠展拜。所
以明孝思也。

至親骨肉。喜聚惡散。生既如斯。死亦宜然。昔趙忠
敏有族葬圖。呂新吾有儒葬圖。族葬則左昭右穆。
以世爲列。不容淆亂。儒葬則制如井田。名曰抱子。
攜孫。又名拱祖。子孫雖極貴。非賜葬及穴盡。不得
別塋。近世士大夫家。獨不然。父兄一經物故。便思
另立塋園。豈以祖考爲不屑從耶。要皆惑於風水
之說。自私自利。不顧親親之義耳。抑知風水二字。
先儒辨之甚力。而葬埋之法。如趙呂二公者。亦不
爲少。吾子孫其倣而行之。如東南方土薄。勢必不

堪多葬者別論可也

期喪以下等服制如現在仕途退居持服若只閒

散家居照常持服務須各遵定制如期變服此禮

樂之本教化之源慎勿以無關緊要目之

以上梁氏家訓

正嫁娶

夫婦人倫大綱天壽之萌也世俗嫁娶太蚤未知

爲人父母之道而有子是以教化不明而民多天

王吉疏

凡議婚姻當先察其婦與壻之性行及家法何如

勿。苟。慕。其。富。貴。壻。苟。賢。矣。今。雖。貧。賤。安。知。異。時。不。
富。貴。乎。苟。或。不。肖。今。雖。富。貴。安。知。異。時。不。貧。賤。乎。
且。婦。者。家。之。所。由。盛。衰。也。苟。慕。一。時。之。富。貴。而。娶。
挾。其。富。貴。鮮。有。不。輕。其。夫。而。傲。其。舅。姑。養。成。嬌。妒。
之。性。異。日。爲。患。曷。其。有。極。借。使。因。婦。財。以。致。富。依。
婦。勢。以。取。貴。苟。有。丈。夫。之。志。氣。者。能。無。愧。乎。
世。俗。好。爲。襁。褓。許。婚。指。腹。成。親。及。旣。長。或。不。肖。無。
賴。或。身。有。惡。疾。或。家。貧。行。污。遂。致。從。違。兩。難。訐。訟。
者。多。矣。是。以。先。太。尉。嘗。曰。男。女。必。俟。長。成。議。婚。終。

身無後悔。此子孫當法也。

以上司馬溫公

長子容當爲娶婦。須遠求小姓。使足生子。天之福

人。不在貴族。芝草無根。醴泉無源。

虞翻與弟書

世人多慎於擇壻。而忽於擇婦。其實壻易見。婦難

知。所繫甚重。豈可忽哉。

程伊川

人家有男。雖欲擇婦。有女。雖欲擇壻。又須自量我

家子女如何。如我子凡下。若娶美婦。豈特不和。或

生他事。如我女不如彼子。萬一不和。卒爲所棄。男

女婚嫁。切須自揣。

文公家禮

近日婚嫁愆期。多因聘禮奩貲之艱難。不知親戚全在情義相好。豈在財帛相與。女家求厚聘。是賣女也。求得厚聘。必須厚嫁。何益之有。若云體面攸關。每見人家因厚嫁女而致家私消乏。既致消乏。有何體面。娶媳止要新婦端莊貞靜。要甚粧奩。豈曰新婦粧奩豐厚。可以濟子之貧乎。不知貧富有命。命該富厚。雖無妻財。亦能富厚。命該貧窮。雖有妻財。亦必貧窮。曾見人家新婦粧奩豐厚。有自己作孽。而嫖賭兼行。盡化烏有而後已。則厚奩何益。

而亦何苦。嗣後嫁娶俱須從儉。不可奢侈。貧家固宜如此。若富饒之家。併有名器之家。乃一鄉表率。更宜如此。

正妻無子。當置婢妾。但不可多置。多則區區一木。難經衆斧之削。若雨澤不周。又難固怨女之心。閨門自此可危矣。以上克家堂家規

嫁娶之禮。當稱家有無。隨宜厚薄。原無一定。不易之例。世俗務求飾觀。竭力成禮之後。卽至一貧如洗。試思一時虛文。何益於兒女生計。卽使盡有實。

濟而本家困乏如此。日後何能再行別項禮節。源
源不竭乎。又見女子自矜嫁貲之厚。驕慢其夫。夫
不能屈之。有終身唯唯從命者。可見厚嫁之貲。反
爲傷倫害義之物矣。且士庶之家。財產易盡。固當
善畱餘地。卽宦家祿入有限。若非做貪官。作罪孽。
何從供其靡費乎。大抵敗名壞品。多由於用度過
奢。不獨嫁娶一事爲然也。靳氏家訓
婚姻者。人道之始。而風化之原也。兩姓締結。惟問
其傳家之規範。與察其子女之體貌何如。而貧富

貴賤不與焉。今之人。往往輕貧而重富。惡賤而喜貴。無論富貴不足久恃。即使足恃。而其識固已卑矣。况如我貧賤而攀援之。能必其從我乎。彼富貴而自據之。能必其與我乎。而近日世俗可笑。其擇壻婦。每欲其自嫡出者。夫嫡出之子女。未必定賢。而非嫡出之子女。未必定不賢。而顧以此爲取舍。此尤婦人女子之陋見。斷斷不必拘者也。人不幸中年喪妻。則續絃一事。不可不慎。若娶再醮之婦。其節操已失。其廉耻已亾。一至人家。往往

輕慢其夫。殘虐其子女。凌轢其家人僕隸。忍之不可爭之。不得化之。又必不能。其爲害固非淺鮮。至於娶人閨女。亦有許多不妥。蓋男子在少年時。情欲不卽能淡。故其精力消耗已多。至中年稍知利害。正當加意珍攝。若娶閨女。則年齒不倫。性情亦異。弛床第之歡。恐非彼之所願。竭衾裯之愛。大非我之所宜。而况子若不孝。有後母。卽有後父之嫌乎。故凡當中年喪妻。或已有長子。竟以家事委之。獨自坐臥一室。無所罣礙。何等快樂。卽料理家務。

亦得保養精神。爲却病延生計。此身受用不小。倘爲子息起見。則姑置婢妾。奉侍左右。稍稍優禮之。使一家人不敢輕褻。彼亦不至自甘人下。而其後去畱惟我。此亦計之得者也。以上梁氏家訓

擇交遊

道義者。身有之。則貴且尊。人生而蒙長無師友。則愚。是道義由師友有之。而得貴且尊。其義不亦重乎。其聚不亦樂乎。周子

學者必求師。記問文章。不足以爲人師。以所學者

外也。故求師不可不慎。所謂師者何也。曰禮也。義也。程子

能攻人實病者至難也。能受人實攻者爲尤難。人能攻我實病。我能受人實攻。朋友之義其庶幾乎。

不然。其不相陷而爲小人者幾希矣。

胡五峯

凡取友必取趨向正當。切磋琢磨有益於己者。若乃邪僻卑汙。與夫柔佞不情。相誘爲非者。謹勿近之。

許魯齋

但願溫恭直諒之友。來此講學論道。示以孝友謙

和之行。德業相勸。過失相規。以教訓我子弟。使毋
陷於非僻。不願狂躁惰慢之徒。來此博奕飲酒。長
傲飾非。導以驕奢淫蕩之事。誘以貪財黷貨之謀。
冥頑無耻。扇惑鼓動。以益我子弟之不肖。嗚呼。由
前之說。是謂良士。由後之說。是謂凶人。我子弟苟
遠良士而近凶人。可謂肖子乎。戒之戒之。
王陽明
客座私
祝

習舉業。切記不可一日無師。無師則無嚴憚。無考
稽。雖十分用功。終屬疎散。以自在故也。又必須擇

好。師。如。一。師。不。愜。意。卽。辭。了。另。尋。不。可。因。循。遷。延。
致。誤。學。業。又。必。擇。好。朋。友。日。日。會。講。切。磋。則。舉。業。
不。患。其。不。成。矣。楊椒山遺訓

一。切。伎。倆。性。氣。師。長。前。逞。不。得。一。切。聲。華。勢。利。師。
長。前。矜。不。得。一。切。儀。文。情。愛。師。長。前。苟。簡。不。得。故。
古。人。履。可。進。雪。可。立。財。可。公。難。可。赴。耕。耘。可。代。洒。
掃。可。供。顯。秩。可。辭。仕。進。可。遲。三。年。衰。可。服。數。年。墓。
可。廬。總。之。陶。鑄。之。恩。決。不。可。負。何。也。成。我。者。恩。與。
生。我。者。同。范竹溪
做人鏡

過從不間寒暑。切磋只在身心。問餽止以詩書。飲

饌安於簞豆。方成道義之交。

賀陽亨思聰錄

與人交游。無問高下。須常和易。不可妄自尊大。修

飾邊幅。若言行崖異。則人豈復相近。然又不可太

褻狎。樽酒會聚之際。固當歌笑盡歡。恐嘲譏中觸

人諱忌。則忿爭興焉。

袁氏世範

與剛直人居。心所畏憚。故言必擇。行必謹。初若不

相安。久而有益多矣。與柔善人居。意覺和易。然而

言必予贊也。過莫予警也。積尤悔於身而不自知。

損孰大焉。故美味多生疾。藥石可以長年。與善人交。有終身了無所得者。與不善人交。動靜語默之間。亦從而似之。何耶。人性如水。爲不善如就下。故易安可不擇交。如族人鄰里親戚中有狡獪子弟。能恃強凌人。損彼益此。富家多用之以爲羽翼。且得目前快意。此曹內旣姦巧。外常柔順。子弟責罵狎玩。常能容忍。爲子弟者亦愛之。他日家長旣歿之後。誘子弟爲非者。皆此等人也。唐史有言。妖禽孽狐。當晝其伏息自如。待夜乃爲之不祥。

正謂此曹。若平日延接淳實剛正之人。雖言語多拂人意。而子弟與之久處。必有身後之益。所謂快意之事。常有損。拂意之事。常有益。凡事皆然。宜廣思之。

以上馬體衛敎家箴

朋友居五倫之一。且問道講學。解惑釋疑。理劇分憂。患難緩急。非友無以濟之。固不可一日無也。然貴擇其賢而有益者。德業相勸。過失相規。斯有得也。苟比之匪人。導之以邪。蕩我心志。眩我耳目。以至飲博荒亾。其不喪志辱身者。幾希矣。然亦顧其

人之自擇何如耶。古云。近硃者赤。近墨者黑。是以君子必慎其所處。

鐸言

直友難得。而吾又拒以諱過之聲色。佞人不少。而吾又接以喜諛之意態。嗚呼。欲不日入於惡也難矣。

呂新吾

以勢利交者十有八九。以道義交者十無一二。勢利之交。甘如醴。雖易合而亦易離。道義之交。淡若水。雖難合而亦難離。二者猶冰炭之不相爲類也。子弟不學無識。馳逐於勢利之交。而不求道義之

益見其落落難合。則以爲怪。所以德業日隳也。凡人交友。貴於德業相勸。過失相規。患難相恤。久要不怠耳。近來多以褻狎爲相愛。以阿諛爲相知。全無久而能敬之風。安望其嚴憚切磋。相與有成乎。至於一言不合。怒氣相加。臨財則不讓。臨難則袖手。必然之勢也。

世趨日下。安能盡得賢士而友之。但使尋常朋友中。有能稍存信行。不失其恆心者。便爲端人。當至誠相與。以古道先施之。即使我施而彼不報。亦姑

以情恕之。如其改心易節。萬不可交。亦須善爲遠之。不可一旦絕人。已甚。所謂君子絕交。不出惡聲也。

以上靳氏家訓

教子之道。擇師友。是第一急務。今之師。滿街巷矣。予。以爲非有實學。問真人品。不可以爲師。何也。學問實。則可以啓愚蒙。人品真。則可以養德器。切不可妄信人言。徒採虛望。惟自家畱心察訪。見有如是之師。卽延請到家。起居服食。一一優以厚禮。而待。以至誠。蓋禮之厚。待之誠。彼未有不感格而盡。

心竭力者。而其道又不可以不久。久則師弟相習而服之素。賓主相得而信之深。若今年易一師。明年又易一師。未有能成功者也。至於尊不如師。而實足以助師之所不逮者。則莫如友。夫子論三益。而先之友直。甚矣直友之最足重也。予見今之人。或因一言之合而定交。或因一事之投而結契。往往專以逢迎求悅。諂諛取容。我未有善。彼輒揚之。我已有過。彼終護之。甚且誘我以無益之務。誑我以不經之言。導我以非理非義之爲。惑我以亾身

亾家之術。小則圖醉飽。大則攫貨財。此皆由不直。以至斯極也。予惟擇其出言無阿。行事不詭者友之。縱其人文章才幹。未必兼優。而與之締交終身。有益無損。此則非師而功實與師等。噫。師友間關。係重大。吾子孫慎毋苟焉。梁氏家訓

凜官守

兩訟在官。曲直未定。生死予奪。係吾一言。其可輕忽。今不免曲直顛倒。非因受賄。卽是徇情。否則率意鹵莽耳。有一於此。豈宜居民上乎。韓魏公

今人獄事。只管理會要從厚。不知不問是非善惡。只務從厚。豈不長奸惠惡。大凡事付之無心。因其所犯。考其實情。輕重厚薄。付之當然可也。若從薄者。固不是。只云我要從厚。則此病所係亦不輕。朱子事上使下。皆當主之以誠。行之以恕。恕體其情。而誠以動之。將無人不可感。無事不可爲。故在仕者。必事上官如畏友。視吏胥如僕隸。撫良民如子弟。則無往而非學矣。劉忠宣公官守二字可味。操守之守。要清心。守待之守。要耐。

心

詞訟到官。類是增撰。被毆曰殺。爭財曰劫。入家謂
行竊。侵界謂發屍。一人訴詞。必牽引其父兄弟。
甚至無涉之家。偶有宿憾。亦輒扯入。意謂未辨是
非。且得追呼一擾。耗其錢物。辱其婦女。於憤洩耳。
則反坐之法。宜嚴。果涉虛妄。斷以其罪罪之。庶衆
知儆。而無飾辭乎。鄉民視官如神明。一至公門。吏
卒禁訶。笞撲交錯。已不勝魂消氣沮。固有畏懼刑
繫。覬欲早出。而妄自誣伏者。有吏務速了。强加拷

訊逼令招認者。有長官自恃已見。妄行臆度。吏輩承順旨意。不容不以爲然者。嗚呼。一人坐獄。闔戶並啼。一罪爰成。妻孥典鬻。爰書數語。其得潦草從事乎。欲通下情。莫若大啓門庭。屏去吏卒。躬呼几席之前。康色詰問。以盡所欲言。有壅不得逮者。則懸鑼門外。俾自扣控。使無不盡之隱。其有微隱難明者。必訪於衢。謀於邑。輾轉於寤寐。卽鬼神亦將來告矣。然更有法焉。訟期宜少宜緩。蓋彼有一時忿激。便欲投詞。需日稍久。怒解事定。必有和勸而

不復來者。此亦聽訟之第一義也。

以上昨非
菴日纂

心不可有一毫之偏向。有則人必窺而知之。予嘗

使一走卒。見其敏捷。使之煩煩。下人卽有趨附之

意。遂逐去之。以此知當官者。當正大明白。不可有

一毫之偏向。故爲官最宜安重。下所瞻仰。一發言

不當。殊愧之。更當以法律爲師。旣知律已。又可治

人。凡少年筮仕者。尤宜加念。

薛文
清公

古之居官也。在下民身上做工夫。今之居官也。在

上官眼底做工夫。古之居官也。尚正直。今之居官

也尚姸阿。

居官有五要。休錯問一件事。休屈打一箇人。休妄費一分財。休輕勞一夫力。休苟取一文錢。

卑卑世態。嫋嫋人情。在下者工不以道之悅。在上者悅不以道之工。奔走揖拜之日多。而公務填委。簡書酬酢之文盛。而民事罔聞。時光只有此時光。精神只有此精神。所專在此。則所疎在彼。朝廷設官。本勞已以安民。今也擾民以相奉矣。新法非十有益於前。百無慮於後。不可立也。舊法。

非。於。事。萬。無。益。於。理。大。有。害。不。可。更。也。要。在。文。者。
實。之。偏。者。救。之。敝。者。補。之。流。者。反。之。怠。廢。者。申。明。
而。振。作。之。此。治。體。調。停。之。中。策。百。世。可。循。者。也。
上以

呂新吾

呻吟語

凡。奸。猾。吏。胥。不。利。無。事。無。事。則。法。行。令。熟。何。所。生。
釁。故。往。往。以。有。利。之。言。慫。恿。官。長。斲。削。元。氣。不。少。
世。上。沒。箇。好。做。的。官。雖。抱。關。之。吏。也。須。夜。行。早。起。
方。爲。稱。職。纔。說。做。官。好。便。不。是。做。好。官。的。人。
律。載。刑。屬。斬。絞。流。徒。杖。五。等。罪。有。輕。重。刑。有。等。差。

犯罪之止於杖尚不可枉以流徒乃有一杖而竟致之死地者每見衙門惡隸求索不遂故意重打以致筋骨斷傷者有之或有私受冤對賄囑狠打殞命又有因囑托獄卒暗將人命致死種種險惡不忍言述如果情真罪當自當明正典刑使死者服罪惡者知警何容此輩曖昧致死持刑君子不可不察

上帝好生居官者於刑罰一事最要從輕然地方上有勢惡豪強毒害百姓之人而槩置姑容則豺

狠不除。貽害多矣。故爲政者。寬以待善。類而尤必。

嚴以懲奸惡。

以上日省錄官戒

居官之要。曰清。曰慎。曰勤。而濟之以和。清則精白。一心不敢自私自利。慎則事事敬謹。不敢纖毫貽誤。勤則夙夜匪懈。不敢苟且晏安。至於事上使下之際。一以和平之氣行之。務期有濟於公事而已。從此建功立業。無可限量。總不外此四者。居官者最要平易近民。勿任暴戾之性。使民各得自陳其情。以便周知其疾苦。民有干犯之處。當詳

慎以處之。期合於理。當於法而已。若先以暴怒加之。安能詳察其委曲哉。

大抵無論官之大小內外。一以公忠正直行之。務期爲國爲民。無慚衾影。即使正道不能見容。或得罪去職。而在我不愧不忤。至死而無悔。雖辱猶榮也。如或昧理營私。諂媚阿附。自安庸劣。誤國殃民。究竟以貪污喪敗。史書垂戒。穢跡彰彰。真爲可耻耳。此兩途者。辨之宜明。守之宜堅。總之當以名節爲重。祿位爲輕。最是緊要關頭。學古入官者。亟當

講究之。

做貪官者。多爲子孫之計。不知子孫生下時。一生
貧富貴賤。天已判定。我何必壞此志操。代爲之謀
萬全乎。疏廣云。子弟賢而多財。則損其智。愚而多
財。則益其過。我自有舊田廬舍。子孫勤力其中。足
以供衣食。若復增益之。以爲贏餘。是教子孫怠惰
耳。此真有識之言。以上靳氏家訓
近世理刑者。每遇出富人罪。輒生嫌疑。殊不知法
當坐死。雖貧無生理。理應開釋。雖富無死法。但當

問其理之曲與直不當問其人之貧與富也。又有
一種小民控告紳衿則必疑紳衿欺壓小民殊不
知紳衿小民中皆有良善兇暴但當問其理之是
與非不當問其勢之強與弱也。蓋此皆俗吏之見
宜深戒之。梁氏家訓

崇節儉

儉美德也。古人之所寶也。禹大聖人也。帝舜稱其
德曰克儉於家。人君富有天下猶以儉爲德。况庶
民乎。故曰儉德之共也。又曰儉常足。人能崇尚儉

素深自樽節。省口腹之欲。抑耳目之好。不作無益。以害有益。不務虛飾。以喪實費。食可飽而不必珍。衣可煖而不必華。居處可安而不必麗。吉凶賓嘉。可備禮而不必侈。如此則一身之求易供。而一歲之計可給。既免稱貸舉息。俯仰求人。又且省事寡過。安樂無憂。故富者能儉。則可以常保。貧者能儉。則可以無饑寒。豈不美哉。今之人。不知以儉爲美德。而反以儉樸鄙笑。亦可謂愚矣。是以富饒之家。日腹月削。浸以不足。中人之產。積逋累欠。浸以貧。

乏。於是見利忘義。苟求妄取。兼併爭奪。放僻邪侈。無所不爲。農工商販之家。朝得百金。暮卽用盡。博奕飲酒。以快一時。一有不繼。立見饑凍。於是相攘相詐。甚至盜竊。身罹法網。妻子流離。原其所由。皆不知崇儉之過也。

張文節爲相。自奉養如爲河陽掌書記時。所親或規之曰。公今受俸不少。而自奉若此。公雖自信清約。外人頗有公孫布被之譏。宜少從衆。公歎曰。吾今日之俸。雖舉家錦衣玉食。何患不能。顧人之常。

情由儉入奢。易由奢入儉。難。吾今日之俸。豈能常有。身豈能常存。一旦異於今日。家人習奢已久。不能頓儉。必致失所。豈若吾居位去位。身存身亡。如一日乎。

以上馬體衢教家箴

貧不貌富。可以長貧。牽裾肘見。納履踵決。不爲友。愧殺雞飼母。摘蔬飼客。不爲客愧。夫爲不愧。乃見古人風格之妙。近世士憑陵意氣。塗飾耳目。貧於家。不貧於身。貧於親。不貧於賓。謂不露寒酸本色。能自拔俗。而其末難持。恐不能不別開徑竇。

昨非菴日

如今做人要從苦中更嘗一番方有受用故甘自
苦來甘始可久福由德致福始可保凡做大官幹
大功業的人俱在貧困裡磨難出來卽如范文正
公司馬溫公微時何等落寞而先憂後樂之志不
敢謾語之心自幼時已有定見甘受藿粥惡衣之
困一味只知讀書向學下帷絕編後來際遇時隨
處盡職俱做好官直至叅預大政其至誠所孚四
方仰之百姓愛之凡禍福利害榮辱進退如浮雲

之過前。一毫不入其心。故生有美名。死有令聞。至
今史冊上。見其所行所言。不問賢愚大小。猶知歛
衽起敬。這皆是貧苦中養就來的。直與天地同不
朽矣。如今你們生出來。便喫好食。穿好衣服。先將
後來一段風光。已受用過了。如何又去指望富貴。
如今也難道教你們尋個貧苦來受。只就現在一
意抑畏節省。不要學人飲酒食肉。穿着羅綺。只守
布衣菽粟之分。何等安穩。使後來還可增益。內裡
妻室。也不要聽他搜求珠翠。衣被文錦。靡費金銀。

只如百姓家婦女。用力用勞。凡祭祀燕享烹飪浣濯之類。無不親自督理。你們一意存心讀書。比貧苦書生。更加一倍精進。這便是苦了。庶幾天地鬼神憐汝。鄉黨敬汝。祖宗佑汝。父母愛汝。僮僕畏汝。何愁富貴不至。即使不得。猶不失爲守分君子。如此代代相承。何至墮落。畢竟有光大之時。如不知止足。軀殼上重重包裹。口舌上味味爭求。只在外面圖箇好看。以驚動俗眼。却把孝親敬長信友宜家性分內事。全不去理會。甚至踰越禮法。毀亂性。

真。戕賊身命者。競趨而甘心焉。先從僮僕鄰里。從
傍竊笑。况天地之高明。鬼神之正直。宗親之衆多。
祖宗之嚴。父母之尊。有不賤而惡之者乎。這由得
他人。俱是自擡舉自己。做箇好人。甘也可得。福也
可受。不然。則後來苦至。禍至時。恐難禁也。興言至
此。不覺刺心。慎之哉。慎之哉。張鄭西抑情
自損謏言
子孫處事接物。當務誠樸。不可置纖巧之物。務以
悅人。以長華麗之習。

子孫毋得與人眩奇鬪勝。兩不相下。彼以其奢。我

以吾儉吾何害乎。

以上鄭氏家範

子弟有耽於情慾迷而忘返。至於破家而不悔者。蓋始於試爲之。繇其中無所見不能識破。則遂至於不可回。

起家之人。生財富庶。乃日夜憂懼。慮不免於饑寒。破家之子。生事日消。乃軒昂自恣。謂不復可慮。

以上

袁氏世範

與其貪饕以招辱。不若儉而守廉。與其干請以犯義。不若儉而全節。與其侵奪以聚仇。不若儉而養

福與其放肆以逐欲不若儉而安性

范竹溪

儉美德也。余謂仕路諸君子崇尚尤急數椽可以蔽風雨。不必廣厦大庭也。痴奴可以應門戶。不必舞女歌兒也。繩床可以安夢魂。不必花梨螺鈿也。竹椅可以延賓客。不必理石金漆也。新磁可以供飲食。不必成窰宣窰也。五簋可以敘間濶。不必包席優觴也。經史可以悅耳目。不必名琴古画也。去一分奢侈。便少一分罪過。省一分經營。便多一分道義。慎之哉。

魏環極庸言

以前風尚儉樸。人多質實。近來多以奢侈相尚。一切服食居處。備極華靡。日新月異。以相誇耀。稍不及人。卽以爲耻。除屋宇田園之外。亭池臺榭。務極雕崇。雖重費而不惜。以供目前之娛樂。三黨親友之間。卽有貧窘不支者。如同陌路。莫之憐憫。何不將此等無益浪費。施濟其困。旣可博現在之美名。又可得將來之食報。夫極盛者必衰。乃天運循環之理。最爲可憂。程伊川云。人於外物奉身者。事事要好。只有自己的身心。却不要好。苟得外物好時。

殊不知自家身心。先已不好了。身與心尚且不好。

又安得保外物之常好哉。

靳氏家訓

不肖子不肯作家。無論已。至如肯作家者。十分精
緊。一絲不漏。亦不是好消息。其家必有奇禍。須是
從寬一分。畱有餘不盡之意。祚方綿遠。

日省錄

風俗之奢靡。無事不然而嫁娶尤甚。其娶也。聘定
納采之文。費無算焉。其嫁也。粧奩服飾之具。費無
算焉。博一日之觀美。耗無盡之財貨。至力之不足
而鬻產鬻產不足而揭債。謂不如是。則一切苟簡。

世俗必非笑之。殊不知嫁娶之後。貧將益甚。其非笑終得免乎。且非笑之在目前者。猶有限。而其在日後者。可勝計乎。乃習俗相沿。莫之或顧。遂使有子而不得娶。有女而不得嫁。甚可歎也。夫婚嫁亦稱其家之有無耳。富者固不必詭托於貧。而失之太嗇。貧者更不可艷慕乎富。而失之好奢。男婚女嫁。總令各及其時。則天理當。人情安。世俗之非笑。何足計哉。

臧獲僕妾。供奔走。給使令。分至卑也。身至賤也。今

日巨室大家。其僕縱侈而無禮甚矣。宮室輿馬之壯。甲於鄉閭。服飾器用之華。耀於耳目。其婦若女。莫不珠玉其首。而羅綺其身。爲主人者。非特不禁之斥之。抑且愛之喜之。殊不知欲厭其欲。必竊主之財。欲逞其奢。必攘人之利。且奢華是尚。卽開僭越之門。靡麗不懲。漸成驕慢之勢。予見人家有不再傳而豪奴悍僕。藐其主而欺之。及背其主而去之者。皆其平日之怙侈致之也。是故治家者。必嚴立規矩。務使男婦一遵禮法。不得少有過分。但上

者下之倡也。上節用則下之侈用者寡矣。上守禮則下之越禮者寡矣。然則禁飭臧獲尤自躬行節儉始。

甚哉近日之子弟。其崇尚華靡爲已極也。画棟雕欄而宮室之華靡極矣。錦羈繡轂而車騎之華靡極矣。蜀錦齊紈文犀玳瑁而服飾器皿之華靡極矣。無論目前之暴殄足惜。將來之窮餓堪憂。當其飾觀炫美。意氣洋洋。而胸中實一無所有。識者已鄙而薄之。且因子孫之怙侈不肖。從而誚讓其父。

兄刺譏其先世。下喪名節。上辱門風。子弟苟有志
氣。當不爲此。今夫宮室蔽風雨而已。画棟雕欄。何
爲乎。車騎代徒步而已。錦羈繡轂。何爲乎。服飾器
皿。禦寒備用而已。蜀錦齊紈。文犀玳瑁。何爲乎。願
吾子弟。禁飭華侈。返歸儉樸。詩書充腹。腴於富室
之膏粱。道德澤躬。麗於貴人之文繡。苟舍其在我
而徒求誇耀於世俗。可耻莫大焉。以上梁氏家訓

安義命

受形天地。各有定數。治亂窮通。斷非人力。惟當守

我之正而已。然而愛身明道。修己俟時。則不可一

日忘於心。此聖賢傳心之要法。或者放肆自逸。惟

責之人。不責之己。非也。

李延平

凡事物之際。有兩件。有由自己的。有不由自己的。

由自己的。有義在。不由自己的。有命在。歸於義命。

而已。

許魯齋

吾生平未嘗干人。在書局。亦不謁執政。他安能陶

鑄我。自有命在。若信不及。風吹草動。便生恐懼。憂

喜。枉做却閒工夫。枉用却閒心力。信得命及。便養

得氣不挫拆。

謝顯道

士君子修德行義之外。當一聽於天。若計較利達。日夕思慮萬端。而所思慮者。又未必遂。徒自勞擾。祇見其不知命也。且人之子孫。富貴貧賤。莫不各有一定之命。世之人。不明此理。往往於仕宦中。冒昧禮法。取不義之財。欲爲子孫計。殊不知子孫誠有富貴之命。今雖無立錫之地。以遺之。他日之富貴將自至。使其無富貴之命。雖積金如山。亦將蕩然不能保矣。况不義而入者。又有悖出之禍乎。如

宋之呂蒙正范文正諸公咸以寒微致位將相富

貴兩極曷嘗有藉於先世之遺財耶然則取不義

之財欲爲子孫計長久者亦惑之甚矣

薛文清公讀書錄

妒寵而負恃爭妍而取憐此妾婦之道也近世士

大夫見權勢之人多相趨附媚之惟恐後得一美

言則喜溢於色稍見抑之則跼蹐不自安又何異

妾婦之道耶夫壽夭窮通天之命也彼固有權勢

矣亦不能外於天而壽夭窮通於我也譏譏然諛

之恐恐然附之亦可愧也夫若此者人皆以人事

可以致富貴計謀可以致功名不知一作一輟有
物宰之爲之而成者非其能也命之至也况爲之
而不成者多乎世之人役役敝敝於百年之間無
頃刻之自安者不亦深可哀耶不足以爲造物撓
深足以爲造物笑

操履與升沉自是兩途不可謂操履之正自宜榮
貴操履不正自宜困阨若如此則孔顏應爲宰輔
而古今宰輔不復有小人矣蓋操履是吾人當行
之事不可以此責效於造物責效不效則操履必

怠而所守或變。遂爲小人之歸矣。今世間多有愚
蠢而享富貴。智慧而居貧寒者。皆自有一定之分。
不可致詰。語云。天不足西北。星辰西北移。地不足
東南。以海爲池。日中必移。月滿必虧。故與其角者
去其齒。傳之翼者。兩其足。天地生物。必有欠缺處。
使相制相避之幾。渾然天成。乃爲妙理。若一一全
具。則其害尤甚。人能知此理。日加省念。安而處之。
則求盈取足之心亦灰矣。豈不省事。

或問於揀塘陳先生曰。夫子罕言命。又曰不知命。

無以爲君子。孟子亦曰：莫非命也。順受其正。夫事
皆由命。則人事可盡廢乎？曰：不然。凡事固皆前定。
而在我所當爲者。不可不盡。但不應非理妄爲耳。
如死生有命。然凡可以養生而避死者。自當爲之。
苟徒一切諉之命。則命該不死。雖絕粒亦無妨耶。
故聖賢諄諄以義命二字互相發明。宋儒以爲人
事盡。然後可以諉之命。其爲世訓明矣。以上馬體
衢敎家箴

修女則

女有四行。一曰婦德。二曰婦言。三曰婦容。四曰婦

功。夫云婦德。不必才明絕異也。婦言。不必辨口利辭也。婦容。不必顏色美麗也。婦功。不必工巧過人也。清閑貞靜。手跡整齊。行已有耻。動靜有法。是謂婦德。擇辭而說。不道惡語。時然後言。不厭於人。是謂婦言。盥洗塵穢。服飾鮮潔。沐浴以時。身不垢辱。是謂婦容。專心紡績。不好戲笑。潔齊酒食。以奉賓客。是謂婦功。此四者。女人之大德。而不可乏之者也。

曹大家
女誡

諸婦必須安詳恭敬。奉舅姑以孝。事丈夫以禮。待

姊姒以和無故不出中門。夜行以燭。無燭則止。如其淫狎。卽宜屏放。若有妒忌長舌者。姑誨之。誨之不悛。則責之。責之不悛。則出之。鄭氏家範

大凡和睦的人家。皆由內有賢婦人所助。忤逆的人家。亦皆由內有不賢婦人所攬。何謂賢。事舅姑。奉祭薦。敬夫子。睦姻戚。無故不出門庭。不妄笑語。如此之類是也。何謂不賢。多言無耻。邪僻妒忌。恃强凌弱。鼓攬是非。飲酒亂性。徇私蔽公。如此之類是也。鄭氏有曰。天道甚近。福善禍淫。爲婦人者不

可不畏。
女訓

婦人無專制之權。有三從之義。在家從父。出嫁從夫。夫死從子。若其舅姑在堂。爲夫者尚不得自專。況爲婦者乎。且其所職掌者。調甘旨。以奉尊親。潔蘋蘩。以供祭祀。餘惟中饋酒饌。針線紡織。是其本分。原無干預外事之理。後世溺於枕席之愛。惑於浸潤之譖。孝悌之道。漸衰。家門之政。漸亂。一切待人接物之宜。權歸於內。遂至事事失體。貽笑於人。甚至縱其所爲。有不可明言者。惟慎之於始。防之。

於微斷之以剛庶免後患。諺曰：教婦初來，教兒嬰孩，不可不知。女正位乎內，不出閨門，古之道也。除父母有疾病死喪，或兄弟姊妹有嫁娶大禮，方許回母家過宿。至於歲時歸寧，或偶有女眷宴會，只許朝去暮還，不許過宿。

男子有道義之交，有學問之交，有周旋患難之交。然尚須慎擇益友，不可濫交，而誤信匪人。女子原無結交之理，乃有與疎遠者認親，與鄰里拜姊妹。

其意何取乎。非其貪財物。卽爲便於淫亂也。閨門不謹。自此始矣。

婦女不許往寺廟焚香禮佛。亦不得令尼姑女巫賣婆媒婆等人往來出入。至於彈唱說書搖惑耳目。污亂心志。一槩不容入門。媒婆一役止用于娶媳嫁女之時。閒時便不許到家行走。

女子通文識字。而能明大義者。固爲賢德。然不可多得。其他便要看曲本小說。挑動邪心。甚至舞文弄法。做出無耻醜事者。反不如不識一字。守拙安。

分之爲愈也。陳眉公云。女子無才便是德。可謂至言。

孟子曰。不孝有三。無後爲大。凡丈夫三十餘歲無子。自當或娶妾。或納婢。擇其端莊貞靜者。以爲嗣續之計。正妻不許阻撓。若有心懷嫉妒。面爲順從。巧計百出。使之不得同寢處者。更有一種奇妒異悍之婦。將妾婢所生之子。百般作踐。使之不能成立。且有殞滅其生者。其罪誠不容誅。卽按七出之條而去之。若妻和順宜家。爲夫者溺於私愛。寵妾

凌妻以亂嫡庶亦所當戒。禮云叔嫂不通問所以避嫌疑也。近日風俗叔入嫂房漫無忌憚至有戲笑相狎全不循理者相沿已久恬不知怪即使不至亂倫已足傷風敗俗矣。況如此內外無別安保其無亂倫之事乎。今宜永革此無禮之風止許正經事務相見通問平居不得從俗混雜違者家長卽加叱責至若異姓親屬如姑表兩姨之姊妹丈夫與大小兩姨及妻舅之婦並無服制尤須避嫌卽不得已而會面亦不許。

褒狎戲侮

禮云妻者齊也。一與之齊。終身不改。故從一而終。不易之道也。婦人不幸。早年孀居。若能矢志堅守。足不出閨門。一切流蕩邪僻。不入其耳目。真心實意。只爲公夫盡仰事俯育之職。如此。非但節操可嘉。其有功於夫家者甚大。而本家父兄。亦有光矣。即使家貧。不能自存。願甘艱苦。少年無子。願繼房姪承嗣。只要保全名節。此尤難中之難。凡爲兩家親長。決該盡力照管。多方調護。以成其美。烈但婦

人家稟性。豈能個個盡皆貞節。如有不肯甘心苦
守。自應聽其改適。亦是常事。不足爲耻。或一時雖
慕美名而欲守節。至歲久日長。漸變初心。或偶有
感觸。羨慕他家團圓親熱。憎厭自己孤單冷靜。此
種念頭。旣萌。又怕一旦改嫁。被人非笑。遂有名爲
寡婦。私自喪節者。污玷門風。莫此爲甚。爲兩家親
長者。宜預爲商酌。體察其性情。可守則守。不可守
則嫁。不可勉強壓制。以致隱忍敗壞。悔之無及也。

以上斷
氏家訓

凡門外有婚喪龍舟戲法以及一切熱鬧之事婦人毋得出觀。

古云生男如狼猶恐其虺生女如鼠猶恐其虎故男子於彌月之後不妨常抱於外使其熟識外人勿致怕生畏縮女子則深藏內室至會行走之時切宜禁其出外遊戲教以知羞識耻。

鄉村惡俗賽神獻戲男婦聚觀恬不知怪婦人不
出閨門行必蔽面古之制也而乃與男子列坐衆
目交加全然不顧豈不可笑嗣後惟家中有喜慶

之戲許婦人垂簾觀看。勿得往村社出頭露臉。儼然以看戲爲公事。而不顧廉耻羞辱也。

炊煮之事。雖在婢妾。而主母必須親臨廚竈。不特延賓待衆。當有差等。其肴核酒醴。若非主母不能隨時置備。卽或置備。而委之婢妾之手。鮮有不狼

藉暴殄者矣。

以上克家堂家規

御臧獲

凡男僕有忠信可任者。重其祿。能幹家事。次之。其專務欺詐。背公徇私。屢爲竊盜。弄權犯上者。逐之。

司馬溫公

涑水家儀

婢僕有過。既已鞭撻。而呼喚使令。辭色如常。則無他事。蓋小人受杖。方內懷怨。而主人怒不之釋。恐有輕生而自殘者。

袁氏世範

婦人之易生言語者。多由於婢妾之閒鬪。婢妾愚賤。並無見識。以言他人之短。爲忠於主母。若主母有見識。能一切勿聽。則虛妄之言。不復敢進。若聽之。信之。從而愛之。則必再言之。又言之。使主母與人遂成深讐。爲婢妾者。方洋洋得意。

柳城胡氏女範

僮僕姑取其給使令之役耳。切不可聽其言。恐大
有害於事。

薛文清公
讀書錄

奴僕小人就役於人者。天資多愚。作事乖舛違背。
不曾有便當省力之處。如放頓什物。必以斜爲正。
如裁截物料。必以短爲長。若此之類。殆非一端。又
性多忘。屬之以事。全不能記憶。又性多執。所見不
是。自以爲是。又性多狠。輕率應對。不識分守。所以
致主於使令之際。常多叱咤。其性不改。其辨愈忿。
致主愈不能平。於是箠楚加之。或惱怒失手而致。

死○亾○者○有○矣○凡○爲○家○長○者○有○不○如○意○當○云○小○人○天
資○之○愚○如○此○宜○寬○以○處○之○多○其○教○誨○省○其○嗔○怒○可
也○如○此○則○僕○者○可○以○免○罪○主○人○胸○中○亦○大○安○樂○省
事○矣○至○於○妻○女○其○愚○尤○甚○婦○人○既○多○褊○急○狠○愎○暴
忍○殘○刻○不○識○經○書○道○理○且○責○備○婢○妾○亦○非○丈○夫○之
比○主○家○者○宜○於○平○時○常○以○待○奴○婢○之○理○諭○之○庶○爲
兼○勝○矣○袁氏世範
諸○婦○夫○死○有○能○持○節○守○義○而○終○身○不○願○再○嫁○者○主
人○主○母○當○厚○恤○養○以○全○其○志○毋○使○失○所○違○者○必○受

天殃

曹月川家
規輯畧

一應臧獲亦人子也。宜恤其饑寒。節其勤苦。療其
疾痛。時其配偶。情通如父子。勢應如臂指。我既廣
我仁心。彼有不竭我情力者乎。

近世公卿士夫之家。於僮僕有才幹者。爲其主害
人興利者。便以爲快意。而信用之。有老實惇謹者。
以爲不稱已意。而棄外之。譬如入好食爽口之物。
不知積久成疾。若好用便捷之僕。日後必成家禍。
諺云。養痴奴。乘羸馬。此言雖小。可以喻大。

以上馬
體衛教

家箴

每見親友相與有始親而終疎者。多起於奴輩之輕慢失禮。或兩家之僕。鬪口角力。主人誤信先入之言。各護其短。遂致嫌釁橫生。故御下不得不嚴。但凡奴輩與他宅上下人等爭競。可不問理之曲直。先責自己家人。然後再爲剖析。則奴輩自知顧忌。而他人忿爭之氣亦平矣。前輩云。奴僕得罪於人。猶可恕也。若我得罪於人。不可恕也。此語良有深識。

主之御僕。猶君之御臣也。須恩威並濟。凡衣食之類。必須一體周備。使無怨言。其無心之過。些小之失。可宥則宥之。或嚴諭戒飭之。使勿再犯。苟壞法亂紀。酗酒賭博。有關大體者。務以嚴明公正。使重處之。斷不可姑息。以長奸邪。書云。宥過無大。刑故無小。卽此意也。至於有夫僕婦。分雖主僕。誼與兒女一般。卽有姿色可觀。當思物各有主。不得恃勢淫污。以壞陰德。旣失家主之體。必萌弑逆之端。切

戒切戒。

以上斬
氏家訓

御臧獲之道無他在寬嚴相濟而已矣。嚴則束以規條。肅以名分。使內不至於養亂。外不至於生非。而驕慢之風戢焉。寬則憫其勞苦。恤其饑寒。使內有以服其心。外有以致其力。而怨尤之釁消焉。朱子所謂莊以涖之。慈以畜之。是也。倘用寬而不先之以嚴。用嚴而不繼之以寬。欲以養女子小人。豈不難哉。

驕奴悍僕不可畜養。而來歷不明之人尤不可輕收爲奴僕。

家奴於途次遇我本族宗支以及壻舅等親雖極貧賤不堪衣衫襤褸者皆當下馬旁立不得揚鞭經過察出重責勿縱

凡我家奴男不得用時樣紗緞并貂皮狐腋女不得用時樣紗緞與珠玉金寶我子孫亦不得以此賞給

蠹家莫甚於冗食家中僕婢雖多勿容懈惰務令各有專業習成一技可免蚕食之累
僕婢皆當及時謀其婚配不得致有怨女曠夫以

傷和氣。

家生子。有聰明俊秀者。教之讀書學算。培養長成。後必有用。

僕婢有過。第當薄懲。毋得過責。致傷肢體。其寒暑饑飽。疾病勞逸。與其心曲中隱微。有不敢言者。皆當一一體恤。昔人云。此亦人子也。此言深有味。以上

梁氏
家訓

